



Vestland fylkeskommune

Att:

Postboks 7900

5020 BERGEN

Lerøy Vest AS - Uttale til søknad om løyve til å etablere anlegg for oppdrett av matfisk av laks og aure ved Gjerdneset i Alver kommune

Vi syner til brev frå Vestland Fylkeskommune datert 10.01.22 med oversending av søknad frå Lerøy Vest AS datert 04.01.22 om etablering av anlegg for oppdrett av laks og aure ved Gjerdneset i Alver kommune.

Fiskeridirektoratet region Vest skal gje ei fagleg uttale om konfliktpotensialet knytt til fiskeriinteressene. Vår uttale omhandlar ei vurdering av konflikt med fiskeriinteressene i høve til arealbruk og det marine miljø.

Fiskeridirektoratet region Vest ser at det er konflikt mellom fiskeriinteressene i området og anlegget. Under føresetnad av at følgjande vilkår blir følgd vil vi ikkje rå frå at søknaden vert innvilga:

- Ved avlusing må det takast omsyn til at det eit rekefelt like ved anlegget. Legemiddel som inneheld kitinhemmarar er forbode nærmare enn 1000 meter frå rekefelt, jf. akvakulturdriftsforskrifta §15a).
- Lusebehandling må foretas i brønnbåt dersom det er nærmare enn 500 meter frå rekefelt og/eller gytefelt. Lusebehandlingsvatn må transporterast bort frå anlegget.
- Fortøyingar må ikkje kome i konflikt med rekefeltet i nærleiken av anlegget.

Dersom desse vilkåra ikkje vert tatt omsyn til, vil konflikten ha eit omfang som gjer at vi vil rå frå at søknaden vert innvilga.

Om søknaden

Lerøy Vest AS har søkt om løyve til å etablere anlegg for oppdrett av matfisk av laks og aure ved Gjerdneset i Alver kommune. Maksimal tillaten biomasse er på 3120 tonn. Rammefortøyinga vil vere 660 x 110 meter land og bestå av seks merdar med flytekrage inntil 200 meter i omkrins. Fôrflåten skal plasserast på langsiden av anlegget mot sør.

Lerøy Vest AS beskriver at bakgrunnen for søknaden er at dei trong ei ny lokalitet for å oppretthalde produksjonen ettersom dei har liten mogelegheit til å endre på eksisterande lokalitetar.

Anlegget, inkludert fôrflåte og deler av fortøyingane ligg innanfor areal sett av til kombinert føremål med mellom anna akvakultur. Deler av fortøyingane strekk seg ut i areal sett av til *Bruk og vern av sjø og vassdrag med tilhøyrande strandsoner*. Føresegnene til arealplanen for Meland kommune opnar opp for fortøyingar i dette området.

Vurdering av søknaden

Fiskeri

Fiskeriinteresser kan sjåast i kartverktøyet vårt [Yggdrasil](#) under tema «Kystnære fiskeridata». I nærleiken av planlagd anlegg er det registrert to rekefelt, der det nærmaste feltet er «Nordvest av Bogno». Fiskeridirektoratet region Vest ser positivt på at oppdrettar har tatt høgde for at det går føre seg fiske med reke-trål i området, og at dei har planlagd at fortøyingar ikkje går inn i feltet. Vi vil også ta med dette som vilkår for å rå til at søknaden vert innvilga.

Både nordvest og søraust for lokaliteten er det registrert fiske med passive reiskap. Ut i frå innsende teikningar av anlegget med fortøyingar kan vi ikkje sjå at det vil verte direkte konflikt med bruken av fiskeplassane og anlegget.

I området rundt lokaliteten er det registrert fleire små låssettingsplassar. Anlegget vil ikkje kome i direkte konflikt med desse, men innseglinga kan verte noko meir tungvinn. Det er ingen oppdatert informasjon om bruken av låssettingsplassane.

Rett sørvest for planlagt anlegg er det registrert eit lokalt viktig gytefelt for torsk. Det er forbode med bruk av kitinhemmarar nærmare enn 1000 meter frå reke- og gytefelt (sjå meir om dette lenger nede).

Vi har høyrte Fiskarlaget Vest i saka som går i mot etablering av ny akvakulturanlegg i området. Dei seier mellom anna at eksisterande og nye akvakulturanlegg i område legg beslag på fiskeområder og fortrengrer yrkesfiske. Uttalen deira er vedlagd.

Fiskeridirektoratet region Vest er samde med Fiskarlaget Vest om at utviding av akvakulturanlegg og nyetablering av anlegg ikkje må vere til hinder for utøving av fiske. Særleg i områder der det går føre seg mykje fiskeaktivitet og i områder som er sett av til fiske i kommuneplanar. I dette tilfelle vil anlegget liggje i areal sett av til kombinert føremål med akvakultur. Det er såleis gjort ei vurdering i samband med arbeid med kommuneplan at både interesser skal kunne sameksistere i området.

Lerøy Vest AS har planlagd at fortøyingane skal gå utanom rekefeltet der det går føre seg fiske med bunntål. Anlegget vil såleis ikkje føre til at feltet ikkje vert trålbart. Det er i tillegg forbode med bruk av kitinhemmarar nærmare enn 1000 meter frå reke- og gytefelt (sjå meir om dette lenger nede). Fiskeridirektoratet region Vest vurderer, med bakgrunn i dette, at konfliktpotensiale med utøving av fiske ikkje er stor nok til at vi vil rå i frå at søknaden vert innvilga.

Marint biologisk mangfald

Det finns data frå kartlegging av marint biologisk mangfald i området. I denne samanheng har fiskerimyndighetene særleg merksemd mot å ta vare på gyteområde for kysttorsk, ålegrasenger, og sikre at rike førekomstar av korall og svamp ikkje vert dekkja til med slam.



Det er registrert førekomst av kamskjel langs store deler av kysten på nordsida av Holsnøy. Det er usikkerheit knytt til korleis utslepp frå oppdrett påverkar kamskjel. Etter det vi kan sjå vil anlegget liggje akkurat i grensa til førekomstane, men ikkje direkte over. Ut i frå resultat frå straummålingar utført ved lokaliteten av Multiconsult i 2021, går straumen både mot aust og vest, men ikkje innover mot kamskjela. Denne kombinasjon gjer at vi vurderer at vi ikkje vil rå frå at søknaden vert innvilga.

Marint miljø og miljøundersøkingar

Vi har ansvar for å følgje opp akvakulturanlegg i driftsfasa, mellom anna anlegget sin påverknad på det marine miljø (§ 35 og § 36 i akvakulturdriftsforskrifta). Vi minner om at det må visast særleg aktsemd ved bruk av legemiddel og kjemikalier for å unngå at midlane slepp ut i det omkringliggende miljø i medhald av § 15 i akvakulturdriftsforskrifta. Fiskeridirektoratet er opptekne av at avlusingsmiddel som inneheld kitinhemmarar vert nytta med varsemd. Særleg i område med verdfulle førekomstar av reke, kreps, krabbe og hummar.

Vi viser i denne samanheng til forskrift om drift av akvakulturanlegg (akvakulturdriftsforskrifta) § 15, 1. og 2. ledd som gjeld bruk av legemiddel og andre kjemikalier:

Ved bruk av legemidler og andre kjemikalier skal det vises særleg aktsomhet for å unngå uakseptable effekter på det omkringliggende miljø. Det skal foreligge en vurdering av de lokale forhold som har betydning for spredningen av legemidler for behandling av fisk mot lakselus i det omkringliggende miljø og beskrivelse av organismer i området som kan påvirkes negativt av slike stoffer. I tillegg skal det beskrives tiltak som kan iverksettes for å redusere negativ miljøpåvirkning av slike stoff.

Vidare viser vi til § 15a, ledd 2, og § 15b:

Kitinsyntesehemmere kan ikke brukes på lokaliteter nærmere enn 1000 meter fra rekefelt jf. de felt som til enhver tid vises i Fiskeridirektoratets nettbaserte kartverktøy. Badebehandling med legemidler mot lakselus i oppdrettsanlegg som ligger i rekefelt og /eller gytefelt eller nærmere enn 500 meter fra slike, jf. de felt som til enhver tid vises i Fiskeridirektoratets nettbaserte kartverktøy, må foretas i brønnbåt. Lusebehandlingsvannet må transporteres bort fra anlegget.

Miljøovervaking

Akvaplan-niva utførte ei forundersøking ved planlagd lokalitet i juni 2021. Resultatet frå undersøkinga synte ein god miljøtilstand.

Det vert søkt om å etablere anlegget i eit område med fleire eksisterande akvakulturanlegg. Miljøtilstanden i nærleiken av lokaliteten det vert søkt om, har vore jamleg undersøkt gjennom B-undersøkingar (etter NS 9410). Desse er rapportert til Fiskeridirektoratet. Resultat frå undersøkingane som har vore gjennomført i driftsfasen på nærliggjande lokalitetar har synt at lokalitetane er påverka av akvakulturverksemd.

Det er fem lokalitetar som ligg innover i Mangersfjorden og Radfjorden der lokaliteten ved Gjerdneset vil plasserast i indre del av Mangersfjorden. Etter å ha samanlikna resultat i frå B-undersøkingane utført på dei fem lokalitetane kan ein sjå at dei prøvepunkta som ligg over djupområder i fjorden får dårlegare miljøtilstand, sannsynlegvis fordi organisk materiale frå oppdrettsverksemda kan akkumulerast der. Basert på dette er det sannsynleg at det også vil kunne akkumulerast organisk material under anlegget på ved Gjerdneset i dei djupare områda. Vi føresett at Lerøy Vest AS har avbøtande tiltak på førehand for å hindre at miljøet på sjøbotn under anlegget verte dårleg.



Fiskeridirektoratet region Vest er uroa for at etablering av nye akvakulturanlegg i dette området vil verke negativt inn på miljøtilstanden i fjorden. Vi understrekar difor viktigheita av at miljøet ved lokaliteten følgjast nøye med på. Fiskeridirektoratet region Vest har mogelegheita til å justere ned maksimal tillaten biomasse ved ein lokalitet dersom lokaliteten hamner i tilstandsklasse 4 (svært dårleg) ved ein B-undersøking.

Akvakultur

Alver kommune ligg i produksjonsområde 4 som har raudt lys. Dette betyr at produksjonen i utgangspunktet må reduserast. Kommunen er ein av åtte kommunar som arbeider med ein interkommunal plan for sjøareala i Nordhordland. Ei av dei største utfordringane er auka press på arealbruk og konflikt mellom dei ulike interessene.

Fiskeridirektoratet region Vest meiner det ville vore ein positiv signaleffekt for oppdrettsnæringa at ein frigjer tidlegare akvakulturareal ved tildeling av nytt – særleg i område der sjøbotn ikkje tåler drift frå akvakulturverksemd. Lerøy Vest AS / Sjøtroll Havbruk AS har lokalitetar der miljøtilstanden under anlegga er dårleg (mellom anna i Sørfjorden). Ved tildeling av lokalitet Gjerdneset bør ein ta ei vurdering om nokon av lokalitetane med dårleg miljøtilstand kan avviklast.

Vi ber om at våre innspel takast omsyn til og at vi får kopi av vedtak i saken.

Med helsing

Leni Marie Lisæter
seksjonssjef

Charlotte Skeide Norseng
rådgiver

Brevet er godkjent elektronisk og vert sendt utan handskriven underskrift.



Mottakarliste:

Vestland fylkeskommune

Postboks 7900

5020

BERGEN

Kopi til:

Alver kommune

Postboks 4

5906

FREKHAUG

Fiskarlaget Vest

Slottsgaten 3

5003

BERGEN

Kystverket Vest

Postboks 1502

6025

ÅLESUND

Lerøy Vest AS

Skipavika 54

5397

BEKKJARVIK

Mattilsynet

Felles postmottak

2381

BRUMUNDDAL

Statsforvaltaren i Vestland

Njøsavegen 2

6863

LEIKANGER

VedleggUttale til søknad om klarering av ny
lokalitet Gjerdeneset